

編號 4 號

【渡阿婆去公園寮】李秀鳳原作

阿婆平常時撈滿叔歸家人戴在莊下，放寮日，佢會來厝屋下看佢撈老妹有較高無？有較大無？阿婆來个時節，佢撈老妹會牽等佢个手，渡佢去屋脢个公園寮。

這日，佢兜三子阿婆手牽手又來到公園，一叢一叢開到鬧熱煎煎个櫻花相賽展靚分人看，一群青啾仔停在櫻花樹頂啾啾滾迎等人客。早春个風吹過來，雖然有一息仔清冷，毋過，好得有燒暖个日頭花晟到人歸身鬆爽。

公園肚个細陂塘，畜有盡多紅金鯉，還有幾隻肥卒卒个鴨仔泅來泅去。「阿婆、阿哥，遽遽來看。」先走到陂塘脢个老妹幹頭大嫲牯聲喊。佢牽等阿婆行兼去，看著一條細老鼠緊拚拚泅過來，撈一大群紅金鯉、鴨仔搶食麵包，還生趣唷！脢頭企等个大人細子，大家都看到嘴勾勾。阿婆笑到嘴合毋密，講佢食到七十歲，還毋識看過老鼠泅水泅恁遽。阿婆教佢撈老妹唸：「阿貓牯，出門打老鼠，老鼠跌落陂塘肚。拿來煮，全家食落肚，爬床拖蓆¹肚屎痛啊！何麼个死苦！」

行恁个阿婆，坐在涼亭下个石凳頂歇睏，看佢撈老妹還等本來愛餵魚仔个麵包，扯一細埕、一細埕擲到地泥下，黏皮錫來七、八條對樹頂颿下來絡食个膨尾鼠。膨尾鼠當圖食，毋驚人，還會走兼來撈老妹討食。阿婆看到笑弛弛仔，過路人乜頓腳看到當入文。

突然間，老妹「哇」一聲，講「有蛇」，煞煞走落涼亭肚捕等阿婆个肚屎，驚到歸身緊顫。佢較大膽，行到樹頭下看真兜，大聲笑講：「該毋係蛇啦！係山狗太。」阿婆牽等老妹行過來看山狗太緊領頭，當像撈佢兜相借問。阿婆教佢兩姊妹唸：「山狗太，恁作怪，看著人，領領拜，有時有日，分佢捉著，一片滷鹽一片晒。」

佢問阿婆：「你斷真愛撈山狗太捉去滷鹽晒日頭？」阿婆緊掌佢个頭那緊講：「戇孫得似！童謠為著搭句又押韻，成時會鬥一兜生趣个字眼來錫細人仔。」

佢撈老妹最好渡阿婆來公園寮，毋單淨好搞，還做得聽阿婆講古、學唸生趣个客家童謠，三子阿婆輒常寮到毋想轉屋。

¹ 爬床拖蓆：音 pa cong rha' ciag`；形容非常痛苦的狀態。